

Powšitkowne WOZJEWJENJA

njedźelu, 7. julija 2013

Putnikowanje do Krupki

Na pěše putnikowanje do Krupki su młodostni wot 16 lět tež lětsa zaso přeprašeni. Procesion woteńdže njedźelu, 28. julija, z Chróścic a wróci so pjatk, 2. awgusta. Zajimcy měli so hač do pjatka, 5. julija, w Chróścicach na farje přizjewić, telefonowe čisło (03 57 96) 8 04 00. Po tym so hižo žane přizjewjenja njepřiwozmu. Putnicy zetkaja so njedźelu, 7. julija, po nyšporje w Chróścicach na farje, štož je za wšitkich nowačkow winowatosć. Nyšpor je w 14 hodź. Boža mša w Krupce budže srjedu, 31. julija, w 10 hodź.

Lětni koncert w Radworju

Chór Meja přeprašuje wšitkich zajimcow na swój lětni koncert njedźelu, 7. julija, na zahrodze před Starej cyrkwičku w Radworju. Wot 15 hodź. poskići so swačina. Koncert zahaji so w 16 hodź. Program wuhotuja nimo Mejanow rejwarjo Wudworskeho serbskeho folklorneho ansambla, skupina Wólbernosće a Čmjela Hana, kotraž wjeseli so wosebje na džěci.

Bajka „Woda žiwjenja”

Džěcaca džiwadłowa skupina Bratrowstwa zahraje tutu njedźelu, 7. julija, w 16 hodź. na žurli w Salowje bajku „Woda žiwjenja“. Wšitcy zajimcy su wutrobnje přeprašeni.

Koparski turněr dekanatneje młodžiny

Koparski turněr dekanatneje młodžiny budže sobotu, 6. julija, w Pěskecach. Zakop je w 10 hodź. Přizjewjenja mustwow přijimaja so hač do pónđzele, 1. julija, we Worklecach pod telefonowym čislom (03 57 96) 9 55 95. Nadrobniše informacije namakaće na plakaće we wosadach.

Putnikowanje džěci

Džěci ze wšitkich serbskich wosadow su srjedu, 17. julija, pod hesłom „Štož wón wam praji, to činće!“ na putnikowanje do Róžanta přeprašene. Boža mša budže w 10.30 hodź. w hnadownej cyrkwi. Po mjezyprogramje so putnikowanje z nyšporom w 13.00 hodź. zakónči.

Kemše w Krupce

Na Božu mšu srjedu, 31. julija, w 10 hodź. w Krupce pojedže zaso bus. Štož chce sobu jěć, njech přijewi so pola Šmitec wozydłownistwa w Radworju, telefonowe čisło (03 59 35) 28 60.

Putniska jězba do Słowjenskeje

Za putniku jězbu do Tinjow (Tainach) pola Klagenfurta w Awstriskej wot soboty do soboty, 19. do 26. oktobra su hišće městna swobodne. Prošu tuž, zo byšće so lěpšeho planowanja dla bórže přijewili. Pojedźemy mjez druhim na słowjenske putniske městno Brezje a do stolicy Ljubljany. W Awstriskej wobhladamy sej mjez druhim Maria Wörth, katedralu Gurk a krasnu wokolinu jězorow a horow. Přenocujemy stajnje w kublanskim domje „Sodalitas“ w Tinjach. Přizjewće so prošu pola mje w Radworju, telefonowe čisło (03 59 35) 2 04 25.

Terezija Kubašec